



*Dauid surmonte Goliath d'un coup de fonde, & luy tranche la teste.*

**D**AVID ne voulut point auoir d'autres armes que son baston & sa fonde, & il choisit cinq pierres du torrent, & les mit en sa malette pastorale, & prit la fonde en la main, & s'en alla a l'encontre de Goliath Philistin, lequel dit à Dauid : Suis-ie vn chien, que tu viens à moy avec vn baston ? & il maudit Dauid par ses Dieux. Mais Dauid dit au Philistin, Tu viens à moy avec l'espée & la lance & le bouclier ; & ie viens à toy au nom du Seigneur des armées, Dieu des bandes d'Israël que tu as aujourd'huy deffiées ; le Seigneur te donnera en ma main, & ie te frapperay, & osteray la teste, & donneray aujourd'huy les corps morts du camp des Philistins aux oyseaux du Ciel, & aux bestes de la terre, afin que tous sçachent qu'il y a vn Dieu en Israël, & que toute cette assemblée connoisse que le Seigneur sauue, non point par l'espée, ne par la lance, car au Seigneur est la bataille, & il vous baillera en nos mains. Apres ces parolles le Philistin s'aduança contre Dauid, lequel se hastia & vint au deuant en bataille, & mit sa main en la malette, & prit vne pierre qu'il ietta de la fonde, & tournoyant il frappa Goliath, & fut la pierre fichée en son front, & tomba sur sa face en terre. Et Dauid n'ayant point d'espée en sa main, courut & se tint sur le Philistin, & prit l'espée d'iceluy, & luy trancha la teste. Quoy voyans les Philistins, & que le plus fort d'entr'eux estoit mort, ils s'enfuyrent.